

## 01 潤餅餛

白麗芬

「明仔載你著冗早去菜市仔買潤餅皮呢！」逐年到清明的前一工，阿母定著會叮嚀阿爸。

自我捌代誌以來，若無食著清明的潤餅、五日節的肉粽，就感覺無成咧過節。清明透早我足興綴大人去買潤餅皮，毋但是因為潤餅好食，閣較是憶著欲看人拭潤餅皮。看頭家手裡搨一丸麵粉膏<sup>1</sup>，佇平鼎頂扣一个圓籬仔形，潤餅皮薄縞絲的粗坯就出現，餅皮一時仔就熟矣，頭家隨對小可仔敲敲的餅坵拈起來，一塊潤餅皮拭好矣！頭家的面頭前上無有四、五口鼎，對頭一鼎拭到上尾鼎，閣翻來頭前鼎的時，潤餅皮拄好熟矣，共拈起來，順繼拭一塊新的，就按呢一鼎繼一鼎、一輪繼一輪，時間節甲拄拄仔好，無閩縫嘛袂拍損，連鞭就疊一疊潤餅皮矣。有時陣看伊都已經拭矣，煞閣共麵粉膏向餅坯補彈一下，原來是欲共傷厚的斂一寡轉來，抑是共破空的加補淡薄仔。伊跤手扭掠，袂輸咧表演魔術，我看甲目調毋甘瞞。

潤餅皮買轉來矣，中晝會使餛潤餅囉！阿母共欲餛的料攢甲足豐沛，高麗菜、豆菜、豬肉、豆乾絲恰卵皮攞是主角，啊若塗豆麩、滷苔恰糖粉遮的配角嘛著恰。主角那夾，配角那糝，餛好捲做長株形，上落尾就用蒜仔槓搵寡

tha-má-tò<sup>2</sup>醬抹予黏咧，按呢就蓋好勢食矣。我較小食，本成一餛就飽 tu-tu 矣，毋過無推第二餛是毋放伊煞，這餛干焦餛一屑仔卵皮，主角換做糖粉恰塗豆麩，阿母攞笑我是胡蠅貪甜。

搬來新竹了後，清明時猶原會數念潤餅餛，上網查著菜市仔有咧拭潤餅皮，就專工走去買，本底掠做會人映人，存範欲恰人排隊矣，啥人知去到地，竟然攞免排隊，敢講新竹人無清明食潤餅這號例？

後來發現竹北市仔嘛有一擔賣潤餅餛的，我三不五時就去交關一餛，雖然恰阿母攢的猶差一氣，總是有較贏無，加減有通過癮啦！

若講著故鄉的滋味，潤餅餛定著排有範，伊好親像是風吹線，共咱恰故鄉牽牢牢，無論風吹飛去佗位，永遠會心悶故鄉味。

---

<sup>1</sup>麵粉膏(kô)

<sup>2</sup>閣唸做 thā-má-tò

## 02 海豬救援隊

兩文

古錐的海豬定定佇太平洋迤迤、泗水，雖然有時淡薄仔狡怪，毋過逐家猶是真恰意看伊可愛的模樣。佇臺南四草彼搭有一个「海豬救援站」，毋免去臺東就會當看著海豬，哪會遮好！拄好學校有一門課愛阮去認捌動物，我恰阿君就相招欲來去「救海豬」。佇面冊頂懸，看著有一隻海豬佇北門遐靠沙，就隨去登記，成做海豬救援隊的一份子。

阮全副武裝袂輸欲去做先生，受傷的海豬原來是一隻「大點花」，一下到彼搭，曠闊的救援池內底倚十外个人，逐个人攏注神佇咧共大點花扞予好勢，驚伊去嗾著。看著這個畫面阮一時煞愣去，猶未進入狀況就隨予人叫去鬥相共，連鞭回神參與救援活動。二四點鐘攏愛有醫療人員恰志工相恰照顧大點花，會當講是無暝無日。若是有狀況，阮就愛隨記錄落來，原來海豬嘛會破病，而且因為足勢緊張，治療嘛較困難。阮看著疲勞的志工和衰弱的大點花，想欲加做一寡代誌煞無法度鬥跤手，心肝頭不止仔艱苦。

隔轉工阮全時間去看古錐的大點花，希望伊趕緊好起來。趕去的路裡，無張持接著一通電話，共阮講大點花已經過身矣！阮兩人雖罔毋敢相信，猶是想欲去彼搭見伊最後一面。去到遐，伊已經準備欲送去解剖<sup>1</sup>，在場每一個人

毋是艱苦，顛倒是忝甲失神失神，阮一句話都毋敢講，驚去拍破這個局面。志工看阮按呢生，就主動恰阮開講，才知影原來這個狀況是真平常。做十幾年矣，干焦有八隻海豬順利活落來，所以逐家攏真慣勢。聽著遮的故事，阮感覺閣較佩服，個干焦會當佇細細間仔的辦公室小眯一下，雖然救轉來的機會茫茫渺渺，毋過猶是繼續拍拚，無放過任何機會。

干焦兩工的陪伴，就親像參與手術房對緊張到平靜的過程，最後的結果啥人都毋知，嘛無人會相侷，一心做家己感覺著的代誌，希望有一工會當看著遮的海豬自由自在做海神的囡仔，為海洋加添色彩。

---

<sup>1</sup>解剖(kái-phóo/kái-phò)

### 03 放學了後的臭豆腐

柯達紳

會記得咧讀高中的時，上課擺愛上到下晡五點。放學了後，因為愛複習、寫功課，阮定定幾個朋友招招咧同齊去附近的圖書館做伙讀冊。圖書館的後壁是一間土地公廟，廟邊的樹仔跤會有一寡仔生理人咧排擔賣豆花、雞翼、管仔粿……種種的點心，彼个所在嘛變做阮食暗頓的好選擇。

欲暗仔，日頭的光線照佇車路頂——金爍爍，其中有一擔賣臭豆腐的，規條街仔擺鼻會著伊的芳味。見擺若看著，人客擺排甲艱艱長，阮綴個的跤步趕緊來排隊。踎學校讀規工的冊，揣著位了後，阮總算是會當放予輕鬆，坐落來好好仔開講。無佻久頭家就共臭豆腐送來阮的面頭前，彼个味是芳貢貢，腹肚枵甲擋袂牢，箸擰起來隨夾一塊園落喙內。

豆腐食著韌韌袂感覺油，愈食愈有味，紙盒仔內底閣有一寡仔泡菜恰瓜仔哖。瓜仔哖咄落去是甜甜閣真脆喙，泡菜的滋味是酸甜仔酸甜，酸若親像高中彼當陣一直有袂曉算的數學、讀袂了的冊，逐工恰功課走相逐；甜是因為就算生活佇咧冊堆當中，身軀邊閣有一陣朋友來陪伴共你照顧，閣有頭家親切的招呼，一塊細細塊的臭豆腐煞食會

著深深的人情味，自彼當時，我恰朋友就變做遐的老顧客。臭豆腐恰圖書館嘛變做阮高中三年無法度放揀的記持。

大學了後，逐家出外讀冊，擺有家己的工課愛處理，干焦會當佇歇熱、歇寒的時見一面，見擺若食臭豆腐，高中彼當時鬥陣的畫面就親像一張閣一張的相片，沓沓仔對頭殼浮出來。雖然阮有當時仔會因為小可仔代誌來冤家，毋過就算是無歡喜，猶是共對方園佇心肝內上重要的所在。有個的幫贊恰扶持，我才會當佇彼段霧霧的日子走揣著家己。

講到遮，對個的思念嘛親像咧食臭豆腐的時，味是愈咄愈芳，喙內的思念嘛變做磕袂著的所在，干焦向望這馬無生活鬥陣的個會當快樂，後擺閣見面的時才共思念勻勻仔對個講出喙。

## 04 阿母的鞋店

顧怡君

常在聽人咧講：「查某人的衫仔櫥抑是鞋仔櫥，永遠攞是減一領衫抑是一雙鞋。」這句話我完全同意，因為我佻姊妹仔伴嘛定定相招去惹百貨公司，蓄寡新衫新鞋來犒賞家己。見擺惹過一櫃閣一櫃五花十色的鞋仔，我不三時都會想起細漢的時，阮阿母開鞋店做生理的點點滴滴。

阿母自高商出業了後，就開始鬥扞阮外公的皮鞋生理，無論是招呼來買鞋仔的人客，抑是和賣鞋仔的廠商接洽，阿母的表現大範又閣巧氣，予人呵咾甲會觸舌。阿母對皮鞋生理往來的了解，會當講是蹣佇巷仔內的。

嫁阿爸了後，為著欲維持阮這家伙仔的生活，伊喙齒根咬咧標一跤會仔，稅一間倚菜市仔的細間店面開鞋店。店面雖罔無蓋闊，毋過賣的鞋仔真齊全，不管是查埔的、查某的抑是囡仔的，佇遮攞總揣會著。年兜邊的時陣，來買鞋仔的人客攞會攞甲滿厝間，生理沖沖滾。阿母欠跤手，連阮這幾個囡仔嘛總愛鬥摻落去，逐家是舞甲無閒頤頤。毋過阮攞無閒甲足歡喜，敢若是作穡人大豐收全款，因為一冬就是趁這個流擺。

有閒的時陣，阿母會共一雙閣一雙的皮鞋提落來 si-á-geh<sup>1</sup>。伊會先共鞋油點佇鞋面，繼落來用鞋抵仔抵，才

閣用一塊布略略仔共鞋仔 ma-sah-tsih<sup>2</sup>，這引推、彼引鑢，共鞋面拭甲金爍爍，予伊金甲若一面鏡會照影。

阿母做生理是講信用的，服務有品質。佇遮買轉去的鞋仔，人客若準講感覺傷經抑是傷冗，攞會使閣免費提轉來處理，阿母攞有法度包君滿意。若是鞋頭傷狹，伊會用鞋楦共楦予較闊咧；若是鞋仔的後蹬會咬跂，伊就用蠟條鑢予滑，閣用槓槌仔槓予軟，予鞋仔較軟較好穿；啊若是鞋仔冗去，阿母就會佇鞋底苴一塊鞋苴仔，予伊穿著較合跂，行路較袂 hop 咧 hop 咧。

阿母的鞋店養飼阮幾若冬，雖罔後來鞋店的生理阮兄弟姊妹攞無接手，各人有各人的工課佻事業，毋過這間鞋店留予阮的是阿母的用心佻對阮的疼痛。

---

<sup>1</sup>閣唸做 si-á-geh

<sup>2</sup>閣唸做 mâ-sah-tsih

## 05 阿媽的 kha-báng<sup>1</sup>

余韶璋

過年前兄弟姊妹做伙轉去舊厝搨掃，拄入門看著掛佇壁堵彼張阿媽的舊相片，予我想起細漢的時，阿媽三不五時會來阮兜蹠幾工，才閣轉去庄跤。毋過自從阿公過身後，阿爸煩惱阿媽一個人蹠庄跤無人通好照顧，就共阿媽接入來市內。

聽講阮公族仔佇地方上誠有名望，阿公自做囡仔的時就毋捌為錢煩惱，所致結婚了後伊嘛攏無咧做工課。是講金山銀山死坐活食嘛會空，阿媽自嫁來這個家就誠拚勢，日時愛去田裡作穡，暗時轉來閣愛款厝內的大細項代誌。因為生活的重擔，致使伊食老變甲曲痾曲痾。

伊棺彼跤細跤 kha-báng 跔樓梯的形影，我一直無法度放袂記得。我捌偷偷仔覘佇門邊，看阿媽共 kha-báng 開開，內底干焦囡幾領平常時仔通替換的衫仔褲，恰一張阿公少年時所翕的相片。伊定定會坐佇眠床邊暗暗仔流目屎，我共阿媽問講：「阿媽你人無爽快，是無？」雖罔伊攏會共我講：「躉孫的，阿媽人無代誌，彼是食老咧流目油啦！」毋過我知影，彼是因為伊離開生活幾若十冬的故鄉，恰心悶阿公所流落來的目屎。

阿媽一冬攏會來阮兜蹠兩三個月，逐擺月底猶未到，

阿媽攏會提早共包袱仔款好勢，聽候日拆頂面的時間到矣，就會叫阿爸載伊去高雄二伯個兜。阿爸攏會共阿媽唸講：「佇嘉義蹠甲好勢好勢，是按怎一定著愛按呢掉跋反啦？」毋過阿媽嘛是攏會堅持愛阿爸載伊去，若無，伊就會受氣，幾若工無愛插阿爸。

阿媽佇四個後生的厝內輪流蹠，彼跤 kha-báng 嘛綴伊佇高雄恰嘉義來來去去。大漢了後，我查查仔會當理解，是按怎阿媽會遐爾堅持咧？毋是因為阿爸、阿母對阿媽無夠好，應該是阿媽驚外口人誤會伊倚孤人，是毋是其他的囡兒序細對伊無有孝，才會遐爾堅持欲徙岫。彼跤 kha-báng 陪伊行人生最後的路途，內底所貯的毋但是衫仔褲，嘛是做人父母替後生、查某囡設想的愛。

---

<sup>1</sup>閣唸做 khâ-báng

## 06 我上難忘的風景

拾可慕<sup>1</sup>

我毋是一个愛出門的人，平常時散學轉到厝就算無代誌通做，嘛袂想欲出門四界遊。歇暍日有閒的時陣，猶原干焦想欲規日鬱佇厝內。規年當中大概干焦歇寒佻歇熱的家族旅遊，會當予我踏出阮兜，去外面行跤花、四界看看咧。自細漢到今算起來，綴逐家出門迺迺嘛袂少遍，已經袂記得到底去過佻濟所在，毋過總是有一寡風景予我印象足深，若像情景就佇眼前。

有一擺，我拄想講欲趕緊共宿題完成，通好佇厝裡看小說抑是耍手機仔，煞予想欲出門迺迺的阿母半摸半揀，恁去行步道。雖罔我起毛糰，落尾嘛是做伙行，共耳機掛起來，三步做兩步，行佇逐家的頭前遠遠遠，干焦想欲較緊行到盡尾好通看冊。毋過當當我沉迷佇音樂優美的旋律，雄雄一陣好聽的鳥仔聲迴過耳機鑽入來我的雙耳，我就按呢共耳機提落來，越頭四界看，想欲揣鳥仔聲是對佻位來的。毋過這陣嘛發覺著，拄才好聽的聲毋知底時完全消失去矣。恬 tsih-tsih 的樹林內干焦賸有若無的鳥仔聲，我目睷金金佇樹林內四界貓貓看，揣甲領頸仔痠，猶原揣袂著聲音美妙的鳥仔。

雖然無法度知影鳥仔聲是對佻位來，但是煞予我注意

著步道四籬輾轉的景緻。路邊有規排的變葉木，彩色的葉仔烏黝紅蔭茄仔色、青翠翠透濫頓點青、黃錦錦淡柑仔色，目睷前五彩的色緻予我看甲無瞞目。四常看袂上目的樹仔，其實逐樣都有小可仔無仝，就算是葉仔，色水嘛有精差，有一寡閣會濫無仝的嬌色。斟酌看，鶻越的枝葉內，有的生一摺一摺烏幼的樹子，抑是幼屑屑的花蕊，看著實在是足得人疼，予人想欲挽閣毋甘。

向時所看見的風景，猶原若親像佇眼前，規个面感受著微微仔風吹過來，耳空內聽著鳥仔聲樂暢的感覺，可能因為彼時單獨一人佇林內無別人攪吵，予我完全感受著樹林仔展現的一切。嘛可能是我傷少出門，罕得接近大自然，才會共這個光景深深刻佇頭殼內，永遠難忘。

---

<sup>1</sup>拾可慕(Sip Khó-bōo)

## 07 無相鬻的妝姪

張月惠

我毋捌欣恬這個人，毋過從查某囡去讀冊了後，就不時咧喃伊的代誌，比喻講伊逐工透早就起來讀冊，下晡會去健身做重訓，佢個朋友騎機車去環島旅行……。

欣恬這個佢人無仝的囡仔，十三歲致著惡性骨肉癌，對彼工開始，去病院敢若行灶跤咧。三更暝半若雄雄發燒，愛對臺南包車去臺北榮總掛急診。電光片檢查若有白點、烏影就袂食袂唸、暈袂落眠。前後食過十三擺的刀仔尾，落尾手共倒跤鋸掉，才共命拈轉來。

為著保命共倒跤鋸掉是真姑不將的決定，毋過佇佢病疼纒纏、揸拚的時陣，拄好共猛氣佢殺膽牽成出來，予伊會當共拍交落去的，準做是天公伯仔予伊的一種無相鬻的妝姪。雖罔有缺欠，毋過共假跤穿起去原仔予伊行踏、走從的時陣加真自在，活甲真繼拍，嘛得著總統教育獎的肯定。伊會用家己親身的體驗四界去學校做志工，鼓吹閣較濟人佢病疼相戰。伊袂刁工穿長褲抑是長裙共倒跤炭起來，雖然行路無法度像往過遐猛掠，毋過跛步是愈來愈定著。就算拄著困難、橫拚，嘛會用樂暢的心情來對應，共災厄當做另外一款化妝的祝福。

頭一擺看著欣恬是佇清華大學的校園，伊對遠遠的所

在行入來宿舍，笑頭笑面佢阮相借問。查某囡共我講：「阿母，伊就是欣恬。」我的心肝掣一下，是按怎天公伯仔遐勢創治人，怨妒遮爾嬌的 oo-lín-giáo<sup>1</sup>。毋過伊笑微微共我介紹伊的假跤講：「阿姨，真嬌乎！這是我家己揀的圖樣佢色水，吩咐加拿大的設計團隊先印立體圖樣才定做出來的。」三兩句話就共伊樂暢、儼硬的個性展現出來。

舊年查某囡去學校報到，愛先入去實驗室，歇熱學校猶未抽宿舍，就先通勤，逐工往回欲倚三點鐘久，聽候抽煞，才來決定是毋是愛稅厝。欣恬真貼心，招阮查某囡佢伊做伙蹠，講伊的宿舍會使有一个伴做伙蹠。就按呢才有這個緣份佢伊蹠做伙，我嘛才知影這個有志氣的囡仔。

今這個獨立的囡仔，這馬飛去德國做交換學生，嘛申請著荷蘭的學校，欲來繼接伊精彩的人生，咱佇遮深深祝福伊一切順序。

---

<sup>1</sup>閣唸做 ôo-lín-giáo

## 08 櫻花樹跤

葉翠霽

今年歇熱的時，我有參加一個體驗自然生態的活動。老師恁阮一陣人行去陽明公園的櫻花林，阮隨个仔去揀一欉櫻花樹，佇樹跤舒塑膠布倒落來。

我揀的櫻花欉就佇我的尻脊後，金滑的樹身伸對天頂去，樹跤的塗肉恰草埔就是四序的眠床。我共身軀展開，準備欲來和這片樹林盤攏。

目睷看出去，重重疊疊的樹極恰樹葉就是天然的布篷。佇枝葉的後壁是闊莽莽藍色的畫布，三不五時就有白色的雲尪寬寬仔飛過來，閣沓沓仔徙過去。樹葉仔的色緻有的較淺、有的較暗，精差無佻濟，毋過若小可仔開日，一寡有承著日頭光的葉仔隨就變甲光映映，袂輸大明星出場咧，金光閃閃，瑞氣千條！啊若有風躡入來樹林，遮的枝葉就歡喜甲跤鬆手弄，有時綴風絲仔輕輕仔毖，有時綴大港風出力幌，舞步是百百款。風若走，個就閣恬靜落來。我目睷前這幅圖不時變來換去，予人仙看都看袂瘡。

毋但目睷無閒，耳空嘛無咧歇睏。四籬圍仔的蟪蛄蟻直直咧大聲喝咻，每一聲聽著攏力草飽滇，敢若是欲比看啥人的嚨喉空上大空、啥人會當擋上久。個一陣一陣無仝喉韻恰節奏的叫聲鬥做伙，拄好成做一個鬧熱滾滾的合唱

團。有當時仔一兩隻鳥仔會飛來啼幾句仔，可比是演唱會的特別來賓。雖然蟲豸、鳥隻唱歌足大聲，毋過一點仔都袂吵，顛倒予我感覺心肝頭真恬靜。我就按呢那看那聽閣那享受風吹過皮膚的清涼。

山頂的空氣真新鮮，一港一港對鼻空貫入來，若親像咧共我清肺管、洗腹腸兼通血路。我的頭殼放空空，共家己當做是對塗裡發出來的植物。進前的煩惱、緊張恰齷齪攏毋知走去佗位矣。

落尾，雄雄有物件落佇我的胸坎——原來是一枝細細枝的樹極，差不多指頭仔的長度，比麵線較粗淡薄仔，略略仔彎曲，看著誠幼秀。這敢毋是櫻花樹予我的信物咧？我恰伊約束，等寒人的時欲閣來看伊，來看伊變裝了後，紅豔的花蕊開甲滿樹頭。



## 09 我做阿爸矣

游雪君

聽阿母講我細漢的時，毋但足愛哭閣真歹睏癖，定定是拄囡落去眠床，隨就聽著我佇咧嘛嘛吼，予伊連一屑屑仔歇喘的時間都無。逐遍講到遮，我攞會共阿母應講：「我哪有像你講的遐爾歹育飼啦！」阿母總是那笑那共我講：「另日換你做老爸，你就知影矣！」

有一工老師講伊有準備一个足特別的體驗活動，是欲予阮體驗做父母的辛苦。我想講應該就是腹肚藏一粒雞胗仔假做是有身，毋過老師煞對措仔底提一个電子嬰仔出來，伊生做有夠成真正的紅嬰仔，予阮看甲驚神驚神。毋但按呢，伊閣會哭呢！老師講照顧嬰仔真簡單，聽著嬰仔哭的時陣，毋是腹肚枵愛共伊飼奶，就是放屎尿愛換尿苴仔，若無就是想欲司奶愛人共伊抱起來搖。聽老師講甲敢若真好耍的款，我隨擲手報名，就按呢我就升級做便老爸囉！

拄開始抱嬰仔佇學校行來行去，每一個人攞呵咾我真有範，我嘛感覺家己一定會共嬰仔顧甲真好。毋過就佇我上體育課欲招同學鬥陣拍籃球的時陣，雄雄想起老師交代我絕對袂使共囡仔放咧無人照顧，我只好手抱嬰仔，孤單一个人坐佇椅仔頂看逐家耍。

啥人知，予我料想袂到的是，嬰仔是無時間觀念的，不管啥物時陣，想欲哭就大聲吼。抱伊坐公車的時，規車頂的人看我兇兇狂狂提奶罐仔欲飼奶，一个阿姨驚我無經驗，緊倚來我身軀邊共我指導。轉到厝裡，阿母看著驚一趣講：「忖會遮成你細漢的時啦！」聽著嬰仔規暝嘛嘛吼，阿母嘛綴我睏袂落眠，共伊當做是親生的仝款，連鞭驚我尿苴仔包袱好勢，連鞭閣驚我無共伊抱予在，規暝無閒頤頤。

「手抱孩兒，才知父母時。」看阿母陪伴我照顧這個嬰仔的時陣，毋但真有耐性，閣會教我一寡仔顧囡仔的撇步。我感覺家己實在是足見笑的，阿母自細漢共我搵屎搵尿晟養大漢，我煞遮爾愛應喙應舌，閣予伊為我氣身惱命，就連做老爸這件代誌，嘛愛伊共我鬥相共，想想咧閣真歹勢呢！

## 10 狗來富

王彥博

恁敢捌聽過「豬來窮，狗來富，貓來起大厝」？頭起先我對這句話無啥了解，毋過自阮兜這隻烏狗家已走來了後，我才開始認捌這句臺灣俗語。

阮阿公，在庄的攏捌伊，逐家攏稱呼伊「魚仔王」。捌聽阿公咧講，自祖公仔彼代就開始咧撻魚塭，一直到這馬攏無拋荒去，照常做這途。萬項代誌都綿爛做，毋但用心飼，閣毋驚風雨，日也做、暝也做，才成做阮這庄人人呵啫的飼魚仔王。

有一日，阿公佇魚塭咧作穡的時，雄雄有一隻烏色的流浪狗走來塭仔遮，尾仔搖咧搖咧，袂輸有好食的歡喜甲。阿公看著這隻烏狗，就共頭拄仔才掠的魚仔擲一尾予伊，閣共伊呼倚來，毋但共伊的頭掌掌咧，嘛共伊的尻脊駢搭搭咧。這隻狗仔好親像有感受著阿公的善意，就蠕踎阿公的身軀邊，閣倒坦橫予阿公掌腹肚。自彼擺了後，這隻烏狗就綴佇阿公的尻脊後，逐日都綴阿公咧巡頭看尾，袂輸保鏢全款，保護阿公的安全。

風颳咧欲來矣，阿爸千叮嚀、萬交代，交代阿公毋通騎 oo-tóo-bái 去塭仔遐。啥人知姑情規半晡，阿公連聽都毋願，猶是嚮款欲出門，想袂到因為風颳天透大風、摔大

雨，阿公煞佇半中途跋倒，規個人毋但正引跤仔手擦破皮，連欲跔嘛跔袂起來，欲喝救人嘛因為四籬輾轉無人行跤到，真正是擔沙坭海——無彩工。這個時陣，烏狗就趕緊走轉來厝裡，佇門跤口一直吠、一直吠。阿爸看狗仔那跳那吠，看毋是勢，就隨駛車出門，才知阿公因為跋倒人著傷，無法度家已跔起來，也因為狗仔的關係，阿公才會赴送病院。

經過這擺的代誌了後，這隻狗仔就成做阮兜的救星，毋但享受國王級的待遇，閣有濟濟的喙食物仔通好食。我佻小妹常在會共阿公講：「這隻烏狗袂輸恁孫咧！」阿公就會那笑那應：「啥物這隻烏狗！這隻是我上要意的阿富仔！」

阿富仔來到阮兜了後，定定會司奶、弄逐家笑，這時我才真正了解「狗來富」，毋但是帶來財運爾爾，閣會予咱的生活變甲閣較好。